

本經逢源



本經逢原小引

醫之有本經也。猶匠氏之有繩墨也。有繩墨而後有規矩。有規矩而後能變通。變通生乎智巧。又必本諸繩墨也。原夫炎帝本經。繩墨之創始也。大觀證類。規矩之成則也。瀕湖綱目。成則中之集大成。未能達乎變通也。譬諸大匠。能與人規矩。不能與人智巧。能以智巧與人。達乎變通之道者。黃帝靈素之文也。能以炎黃之道。隨機應用。不為繩墨所拘者。漢長沙一人而已。長沙以天縱之能。一脈相承。炎黃之道。信手皆繩墨也。未聞炎黃而外。別有繩墨也。當思醫林學術。非不代有名。人求其端本。澄源宗乎。本經主治者。王函金匱而外。未之聞也。長沙已往。唐逸士千金方。獨得其髓。其立方之峻。有過於長沙者。後世未由宗之。以故集本草者。咸以上古逆順反敷之用。概置不錄。專事坦夷。以適時宜。其間鎖鑰固無足論。即瀕湖之博治古今者。尚爾舍本逐末。僅以本經主治。冠列諸首。以為存羊之意。惟仲淳繆子開鑿經義。迥出諸方。而於委宛難明處。則旁引別錄等說。疏作經言。朱紫之混。能無戾乎。昔三餘齋子有本經註疏一冊。三十五年前。於念義先生齋頭。曾一寓目。惜乎未經刊布。不可復覩。因不自揣。聊陳鄙見。略疏本經之大義。并係諸家治法。庶使學人左右逢原。不逾炎黃繩墨。足以為上工也。上工十全六。不能盡起向骨而生之。吾願天下醫師。慎勿妄恃己長。以希苟得之利。天下蒼生。確遵有病不治。常得中醫之戒。跳出時師圈績。何繩墨之可限哉。

康熙乙亥春王石頑張璐書於雋永堂時年七十有九



